

北京圖書館 編

北京圖書館藏珍本
年譜叢刊



第 64 冊

北京圖書館出版社

□ 北京圖書館 編

北京圖書館藏珍本

年譜叢刊

北京圖書館出版社

第 64 冊



第六十四冊目錄

金忠潔年譜	一
蔡忠烈公年譜	三九
疎香閣紀年	一九三
武舟公年譜	二一七
張忠烈公年譜	二五九
頭等侍衛莫爾歡年譜	三二一
鄭延平年譜	三二九
王伯子自叙年譜	三八七
向若水公年譜	四五三
牧齋先生年譜	五五九
錢牧翁先生年譜	五八七
錢牧齋先生年譜	六〇一
清錢牧齋先生年譜	六七一
李二何先生年譜	七二一

明史本傳

金鉉字伯玉武進人占籍順天之大興祖汝升南京戶部
郎中父顯名汀州知府鉉少有大志以聖賢自期許年十
八舉鄉試第一期年崇禎改元成進士不習爲吏改揚州
府教授日訓諸生闡濂洛正學燕居言動必有規格諸生
嚴憚之歷國子博士工部主事帝方銳意綜核疑廷臣朋
黨營私度支告匱四方亟用兵餉不敷遣中官張彝憲總
理戶工二部建專署檄諸曹謁見禮視堂官鉉恥之再疏
爭不納乃約兩部諸僚私謁者眾唾其面彝憲愠甚鉉當
權稅杭州辭疾請假彝憲撫火器不中程劾鉉落職鉉杜

門謝客躬爨以養父母十七年春始起兵部主事巡視皇城聞大同陷疏曰宣大京師北門大同陷則宣府危宣府危大事去矣請急撤回監宣中官杜勛專任巡撫朱之馮勛二心僨事之馮忠懇可屬大事不報未幾勛以宣府下賊賊殺之馮烽火偪京師鉉奔告母母可且逃匿兒受國恩義當死鉉母章時年八十餘矣阿曰爾受國恩我不受國恩乎庶下井是我死所也鉉哭而去城破趨入朝宮人紛紛出知帝已崩解牙牌拜授家人卽投金水河家人爭前挽之鉉怒口嚙其臂得脫遂躍入水水淺濡首泥中乃絕母聞卽投井妾王隨之皆死賊踞大內踰月始去金水

河冠袍泛泛見水上內官羣指之曰此金兵部也弟鏞辨其屍驗網巾環得鉉首歸合以木身如禮而殮事竣鏞自經後贈鉉太僕少卿諡忠節

本朝賜諡忠潔

金忠潔年譜

弟鏡編述鏞參訂

謹按

萬厯三十八年庚戌七月十九日壬戌伯兄生於北
京崇文門內總捕衙署寓邸生之日與先大父
同是日昧爽先大母隱几臥夢一羅漢入室驚
寤汗如雨辰時伯兄生移刻進士夏公嘉遇來
先大夫喜曰夏公來爲吾兒兆耶因命乳名曰
甲兆命名曰繩第知交中以生辰同祖共相賀

曰其繩祖武乎

四十二年甲寅伯兄五歲發痘得逆症百藥罔效勺水不入者數日氣垂絕伯兄忽見有異僧圍繞層列若百千萬者咸袈裟誦佛時伯兄隔窗呼先大夫曰諸僧來兒可不死旣而漸食痘漸起月餘乃愈

四十三年乙卯伯兄六歲出就外傳一目數行下師大奇之

四十五年丁巳伯兄八歲先大夫改命名鉉字伯玉

四十七年己未伯兄十歲善屬文師喜評其課曰認理真

切措詞奇矯他年大作用人

天啟三年癸亥伯兄十四歲應童子試補京兆尹弟子員
四年甲子伯兄十五歲應順天鄉試本房擬薦以經文稍
異列備卷

五年乙丑伯兄十六歲先大夫爲聘上林苑監監丞朱公
家麟第二女

六年丙寅伯兄十七歲應督學歲試取一等補增廣生
七年丁卯伯兄十八歲

秋八月應順天鄉試舉第一人放榜前一日桂香滿舍
經日不散左右鄰皆聞先是先大夫幼先大父輒命

誦鄒汝愚先生十八領解馬上口占詩曰龍泉山下
一書生偶竊三巴第一名世上萬般難了事鄉人何
事太相驚先大父每謂先大夫曰使汝得如鄒先生
吾願足矣先大夫年十八先大父卒先大夫每述此
語以詔諸子輒泣下而伯兄發解年適十八始知大
父若有前知非偶然也

崇禎元年戊辰伯兄十九歲會試舉南宮第二百二十名
廷試賜三甲同進士出身第一百三十四名觀刑部
政傳臚前一日日正中伯兄入室見紅光滿壁熠熠
如火亟呼鏡暨諸弟等共視許時乃滅

秋七月成三加禮娶元配朱氏

九月伯兄特疏請改教兄應選知縣自以性好靜喜讀書遂請廣文

冬十二月奉旨改授揚州府儒學教授時四弟鉉有遽疾伯兄憂憊甚一夕謂弟鑰曰四弟危矣爲我裁黃箋來吾爲請命於天遂挑燈草表再拜焚之翼日弟鉉漸有起色不數日愈焉

二年己巳伯兄二十歲

春二月赴維揚任教諭諸生先行業而後文章燕居言行俱有規格諸生懍懍事之若耆宿罔敢以洛陽年

少目之者日丹鉛諸生課藝每試必自構文以式之一時文風蔚起從遊者比於胡安定之門

夏六月長子生十一月以痘殤嫂朱氏產後感疾卒鑑弟自睢之揚兄躬督課藝暇則自讀春秋三傳莊子史記

冬十月陞國子監博士回原籍武進祭祖墓悉出積俸徧贍親族

三年庚午伯兄二十一歲

春二月自武進北發迂道至睢省二尊人三月入都時司成爲瑞屏顧公明卿陳公皆加意造士雅重伯兄

特令專試事所第高下衆罔不服凡所拔士皆連擢
第去

夏四月繼娶上林苑監監丞朱公家麟長女先嫂胞姊
也伯兄入都後益喜讀書更沈潛於理學經濟先
玩周易取卦彖大象手錄數過復掩卷靜悟曰我自
有心易不因人解也旣而讀程傳曰得之矣爰以程
爲主朱義次之古今易解多方搜覽以俟參考時自
爲解說然多棄去不存曰未是也讀易之暇則取史
記漢書暨左國通鑑孫吳兵法究之謂學貴實際有
體無用吾不爲也

四年辛未伯兄二十二歲

夏六月陞工部都水清吏司主事監督器皿廠光祿內
監移文謂銅錫諸器例應大造蓋借此冒破錢糧物
料伯兄云當視損壞之大小以定修造豈可援例內
監不敢復言

第二子生十月殤

秋九月覃恩敕命授階承德郎封母爲安人元配贈繼
封俱安人 邊信急奉本部堂委修理安定等四門
軍器共計修過銃礮一千八百有奇長槍等件四千
一百有奇挨牌一千四百有奇人工物料每日親詣

察飭綜核務求堅利風雨不避也

冬十月建言請罷內臣建署時命內監張彝憲總理戶工二部錢糧特建公署伯兄力請止之疏謂廉恥不可不維浮費不可不惜公署旣建勢必強司屬匍匐於獨踞之庭卽諸臣矯矯自好當亦不爲內臣屈而其中保無暮夜多慚寡廉鮮恥以曲護其醜自行其私者乎此風一開將蔑本來之堂屬而不顧而轉倚內臣爲地官冬官之司命奔趨諂諛之習漸見於建署之後褻皇靈而喪士氣甯有甚於此者疏入不報十二月張彝憲公署已建擇日上任欲令兩部司屬行

謁見禮伯兄曰不幸而前言驗矣又具監臣移檄非體一疏極言彝憲亢顏昧心妄自尊大以皇上迪簡之臣子而令其磬折偃僂將置自有之堂屬別行誣妄之儀去不易之公廷強抑刑餘之下臣委質聖朝自矢無玷斷不敢匍匐彝憲獨踞之庭致罹交結之條也得旨各官遇有職事相關自當禮見其餘不必通謁至彝憲上任諸司竟未通謁於是彝憲愧極恨極矣是時本部題管杭州抽分命下隨告病回籍五年壬申伯兄二十三歲

春正月彝憲挾恨以驗放火器題參奉旨下部議處部